

PASSION (PANAONON)

Partangiangan Passion
Marningot Panaonon ni Tuhan Jesus
Borngin I



HKBP JATINEGARA
Senin, 14 April 2025

1. Tangiang na hohom / Saat teduh - Melodi BE 858 1.

2. Marende: BE 857: 1 - 3 --> Jongjong di Ayat 3

- ☞ Husomba Ho Tuhan tangihon au
Sangkapmu ma tongtong pasaut tu au
Ajari rohangki, manghaholongi Ho
Sai lam gandai holong tu Ho
- ☞ Husomba Ho Tuhan, Tangihon au
Mandate tondingki, sungguli au
Ajari rohangki, manghaholongi Ho
Sai lam gandai holong tu Ho

3. Votum – Introitus

P : Marhitehite goar ni Debata Ama dohot goar ni AnakNa
Tuhan Jesus Kristus dohot goar ni Tondi Parbadia.

H : Amen.

P : Tabereng ma induk ni haporseaon i jala na
paujunghonsa,

H : Ima Jesus na manaon parsilangan i,

U : Singkat ni las ni roha tohapNa i hian, so dietong i
hailaon, gabe hundul di siamun ni habangsa ni Debata.

H : Taingot ma Ibana, na manaon paraloan si songon i
dompok Ibana sian angka pardosa asa unang marnaloja
hamu, unang mandate tondimuna!

U : Martangiang ma hita: Ale Tuhan Debata, Amanami na di
banua ginjang! Asi ma rohaM di hami halak na gale on.
Diida Ho na gogo do musunami, sai talu do hami
dibahen, ala ni hagaleonnami. Dibahen i, hupangido
hami tu Ho: Sai pargogoi jala pamonang ma hami
maralohon musu i marhite panaonon ni Anak
haholongan ni rohaM, Tuhan Jesus Kristus. Amen

4. Koor Ina Cipinang

5. Marende: BE 83: 1 “Na Lao Do Biru-biru i”

☞ Na lao do Birubiru i, Mamorsan angka dosa
Ni nasa hajolmaon i, Di benget ni rohaNa
Diporsan do sahitta i, Dilehon do DiriNa i
Tu tangan ni pamunu, Ditaoni do na bernit i
Rodi na tos hosaNa i, Didok Naeng porsanonHu

6. Tabege ma barita panaonon ni Tuhan Jesus andorang so sahat Ibana tu hau pinarsilang i. Jadi diarahon Jesus ma na sampulu dua i, jala didok ma tu nasida: Na nangkok ma hita tu Jerusalem, jala tulus ma tu Anak ni jolma i sasudena, na tarsurat di angka panurirang i. Ai pasahaton ma Ibana tu angka parbegu, gabe insahanna, leaanna jala tijuranna ma Ibana; dung i mulak mangolu ma Ibana di ari patoluhon. Alai ndang diantusi nasida agia otik sian i; na buni do Hata i sian rohanasida, ndang diboto nasida na hinatahonNa i. Dung i dipansang angka Sintua ni malim dohot angka parise ma rapot godang, didok nasida: Aha ma bahenonta? Ai lan do tanda dibahen Halak i! Molo itapasombu Ibana, porsea ma halak saluhutna tu Ibana, gabe ro ma halak Rom mangarampas tanonta dohot bangsonta. Alai hehe ma sada sian nasida, i ma si Kayapas, Sintua ni malim di nasataon i, didok ma tu nasida: Nahurang roha do hamu! Nandang dipingkiri rohamuna, denggan do mate sahalak humophop natorop i, unang laho mago sandok bangso i. Alai ndang sian rohana sandiri dihatahon i; ala Sintua ni malim Ibana di na sataon i umbahen na disuriranghon, na naeng mate ma Jesus humophop bangso i. Alai tahe, ndada holan laho humophop bangso i, alai naeng papunguonNa angka anak ni Debata na marserak dope, laho pasadahon. Asa olat ni sadari i martuptup ma nasida laho mamusa Ibana. Alai didok

nasida ma: Unang ma di pesta i so tung guntur natorop
i!

7. Koor Ina Hanna

8. Marende: BE 78: 2 “O Ulu Na Sap Mudar”

☞ bohi parsinondang na sangap situtu
Beasa tung marlangan sap ijur hurumMu?
Tung aha ma alana umbaen homur mataM?
Na mintop do sondangna di na lao tos hosaM

- 9.** Dung i onom ari nari asa dapot pesta Paska i, sahat ma Jesus tu huta Bethania, na ni inganan ni si Lassarus, na sinunggul ni Jesus sian na mate. Jadi dipauli nasida ma disi sipanganon ujuan di Ibana; si Marta do manghobasi, si Lasarus ma sada donganna mangan disi. Gabe dibuat si Maria ma sahati miak nardus na arga, na so marsaor, dimiahi ma pat ni Jesus, obukna do dibahen mangalapu. Jadi digohi uap ni miak i ma bagas i. Jadi sada sian angka siseanNa, si Judas Iskariot na naeng manjehehon Ibana mandok: Boasa so ginadis miak i arga tolu ratus hupang, bahen silehon-lehon nian tu angka na pogos? Alai ndada na pogos sinarihonna. Umbahen na didok Ibana songon i: panangko do ibana tahe, diusung do asiasi ni halak, ai tu ibana do dipasahat puro i. Dung i ninna Jesus ma: Pasombu ma Ibana, ai diparade do i hira tu ari hatatanomHi. Ai tongtong do adong napogos di tonga-tonga muna, jala asal ma olo hamu, tarpatongon hamu do na denggan tu nasida; Alai anggo Ahu ndang manongtong di hamuna. Intap na tarbahensa do na niulana i; na manjoloani do ibana mamiahi pamatangHu songon di na mananom. Situtu do hatangkon tu hamu: manang di dia di liat

portibi on dijamitahon muse Barita na Uli on,
hatahononna do nang na binahenna i gabe baritana.

10. Koor : JIS

11. Marende: BE 775: 1 “Unang Holsoan”

☞ Unang holsoan unang tahutan di Debatanta
Soada na hurang unang holsoan
unang mabiar, haposi Debata

12. Dung i torang ni arina i, dibege halak natorop na ro tu pesta i, na naeng ro ma Jesus tu Jerusalem, jadi dibuatnasida ma angka maremare laho manomunomu Ibana huhut manjoujouhon: Hosianna! Pinasupasu ma na ro marhite goar ni Tuhan i, Raja ni Israel. Dung i dapot Jesus ma halode sada, i ma dihunduli hombar tu na tarsurat: Unang ho mabiar ale boru Sion, ida ma: Rajam do na ro, marsihundul di anak ni halode. Jala halak parise deba sian natorop i mandok tu Ibana: Orai antong angka siseanMi, Guru! Alai ninna ma mangalusi: Hudok ma di hamu, aut mauhom nasida, manjoujou ma angka batu! Alai dibongoti sibolis do si Judas na margoar Iskariot, sahalak sian na sampuludua i. Gabe laho Ibana martuptup dohot angka Sintua ni malim raphon angka panungganei, manang dia dalanna pasahathon Ibana tu nasida. Jadi sian las ni roha nasida, marpadan ma nasida mangalehon hepeng tu Ibana. Di oloi si Judas ma i, jadi dilului ma tingki na une pasahathon Jesus so sian pamotoan ni natorop i Alai di ari parhobasan parjolo ni pesta Paska i, didapothon siseanNa ma Jesus, angka ninna ma: Tu dia ma patureon nami di Ho panganon Paska i dipangido rohaM? gabe didok ma: Laho ma hamu tu huta i manopot si anu, dok hamu ma tu ibana: Tona

ni Guru i; na dapot ne ma tingkingKu di ho ma Ahu sorang, laho mangan Paska i rap dohot siseanKu. Jadi saut ma disuru Ibana siseanNa dua halak jala didok ma tu nasida: Molo laho hamu tu huta i, pajumpang ma hamu disi dohot sada halak na mangusung aek sahudon, ibana ma ihuthon hamu! Tu ibana ma dok hamu: Di dia do bilut inganan, asa disi hupangan hami Paska i? Jadi patuduhononna ma tu hamu bilut parginjang sada, na lambas, na tipak hinembangan, disi ma pature hamu di hita! Jadi borhat ma siseanNa, dibongoti ma huta i, jadi jumpang nasida ma tutu songon na nidokNa i, gabe dipature ma Paska i. Asa dung bot ari, ro ma Jesus dohot na sampulu dua i.

13. Koor: Ama Gloria

14. Marende: BE 83: 2 “Na Lao Do Birubiru i”

☞ Ianggo Birubiru i, Ima alealengku
Na paluahon tondingki, Disuru Debatangku
Didok mandok AnakNa i, Sai topot ma pardosa i
Naung sun tinoruanHu, Balga tutu do rimasHi
Alai tarbaen do mombun i, Horhonon ni mudarMu

15. Jadi di na mangan nasida, hehe ma Jesus sian na mangan i, ditanggal ma ulosNa, dibuat ma basahan ditapolhon tu Ibana. Diusehon ma aek tu 6 sambong, dung i diburi ma pat ni angka siseanNa, diapusi ma dohot basahanNa na tinapolhonNa i. Dung i sahat ma Ibana tu si Simon Petrus, jadi didok ma mandok Ibana: Tung Ho ma ale Tuhan, mamuri pathu? Dung i ninna Jesus ma mangalusi Ibana, Ndang diantusi ho pambahenanKu na tu ho anggo nuaeng, muse pe botoonmu i. Dung i didok si Petrus ma tu Ibana: Matua

tano on, ndang burionMu pathu. Dung i ninna Jesus ma mangalusi ibana: Molo so burionKu ho, ndang partohap ho di Ahu. Dung i ninna si Simon Petrus ma: Ale Tuhan, unang ma holan pathu, dohot ma tangan dohot ulungku. Gabe didok Jesus ma tu ibana, halak naung maridi i, ndang ingkon be burion; ai nunga sude Ibana ias. Naung ias do anggo hamu, alai ndang luhut hamu. Ai ditanda do sipasahat Ibana, umbahen na didok: Ndang saluhut hamu ias. Asa dung diburi Jesus pat nasida, dipangke ma muse ulosNa, hundul ma Ibana, didok ma tu nasida: Ai diantusi hamu do pambahenanKi tu hamu? Digoar hamu do Ahu Guru dohot Tuhan, jadi ture do pandokmu disi, ai i do Ahu tutu. Asa molo Ahu Tuhan jala Guru muna mamuri patmuna, tama ma nang hamu masiburian pat! Ai sitiruon do Hulehon tu hamu, asa dibahen hamu songon naung Hubahen i tu hamu! Na tutu si tutu do na Hudok on tu hamu: Ndang umbalga anak somang sian indukna, ndang sumurung suruan sian na marsuru Ibana. Molo diboto hamu i, martua ma hamu mangulahonsa. Jadi di na mangan i nasida, ninna Jesus ma: Situtu do na Hudok on tu hamu: sada sian hamu naeng pasahathon Ahu! Dung i marsak situtu ma nasida, gabe dipandok be ma tu Ibana: Nda tung ahu i Tuhan ? alai ninna ma mangalusi: Ia i na rap dohot Ahu manurdukhon tanganna tu paringkauan, i do na pasahathon Ahu!

16. Koor: Duansih

17. Marende: BE 179: 1 – 2

☞ Adong do sada mual i, di na mardosa i
Mansai denggan do mual i pasonang rohangki

- ☞ Aek mual na badia i, i ma di Jesus i
Disesa do tihasta i, dibuat arsak i

18. Jamita:

19. Marende: BE 718: 1-2+4 (Papungu Pelean)

- ☞ Hubege Jesus manjou, Hubege Jesus manjou
Sipalua au manjou, Porsan silang ihuthon ma Au
Sai ihuthononku Jesus, Sai ihuthononku Jesus
Sai ihuthononku Jesus, Huihuthon Jesus Tuhanki
- ☞ Tu Getsemane au dohot, Tu Getsemane au dohot
Rap marungkil dohot Jesus, Mangihuthon Jesus
Tuhanki
Sai ihuthononku Jesus, Sai ihuthononku Jesus
Sai ihuthononku Jesus, Huihuthon Jesus Tuhanki
- ☞ Aloonku ma diringku, Aloonku ma diringku
Porsanonku ma silangku, Mangihuthon Jesus
Tuhanki
Sai ihuthononku Jesus, Sai ihuthononku Jesus
Sai ihuthononku Jesus, Huihuthon Jesus Tuhanki
- ☞ LehononNa hagagoon, LehononNa hagagoon
Dohot tumpal hangoluan, Di banua ginjang na
sonang
Sai ihuthononku Jesus, Sai ihuthononku Jesus
Sai ihuthononku Jesus, Huihuthon Jesus Tuhanki

20. Panutup: Tangiang & Pasupasu